

«ԿՐԹՈՒԹՅՈՒՆԸ՝ ԶԱՐԳԱՑՄԱՆ ՆԱԽԱՊԱՅՄԱՆ» ԿՐԹԱԿԱՆ ԵՐԻՏԱՍԱՐԴԱԿԱՆ ՀԱՄԱԺՈՂՈՎ ԾԱՂԿԱԶՈՐՈՒՄ

Հունիսի 8-10-ը Ծաղկաձորում տեղի ունեցավ «Կրթությունը՝ զարգացման նախապայման» կրթական երիտասարդական համաժողովը, որը կազմակերպվել էր Եկեղեցիների Համաշխարհային Խորհրդի Հայաստանյան Կլոր Սեղան միջեկեղեցական բարեգործական հիմնադրամի կողմից: Համագումարին մասնակցում էին շուրջ ութսուն երիտասարդներ, ներկայացուցիչներ ՀՀ Ազգային ժողովից, ՀՀ Կրթության և գիտության նախարարությունից, Կրթության ազգային ինստիտուտից, Մայր Աթոռ Սուրբ Էջմիածնի Քրիստոնեական դաստիարակության կենտրոնից, Հայաստանյայց Առաքելական Սուրբ Եկեղեցու տարբեր թեմական կառույցներից և երիտասարդական միություններից, Կլոր Սեղանի գործընկեր հասարակական կազմակերպություններից և այլ հարանվանություններից, հյուրեր Վրաստանից, Բելառուսից և Ուկրաինայից:

Ժողովը բացվեց Տերունական աղոթքով, ապա ներկաներին իր օրհնության ու ողջույնի խոսքը ուղղեց ԵՀԽ Հայաստանյան Կլոր Սեղան հիմնադրամի հոգաբարձուների խորհրդի նախագահ, Արցախի թեմի առաջնորդ Տ. Պարզև արքեպիսկոպոս Մարտիրոսյանը: Սրբազան Հայրը մեծապես կարևորեց այս նախաձեռնությունը՝ շեշտելով կրթության անհրաժեշտությունը: «Կարևոր է, որ այսօր հնչի երիտասարդների ձայնը, ինչպես փոփոխել և կատարելագործել կրթական համակարգը ի շահ մեր երիտասարդ սերնդի. երիտասարդների հայացքը միշտ լինում է խիզախ, թարմ և համարձակ»: Այնուհետև Կլոր Սեղան հիմնադրամի գործադիր տնօրեն դոկտ. Կարեն Նազարյանը, ողջունելով համագումարի մասնակիցներին, անդրադարձավ կրթական ոլորտում պետության տարբեր մարմինների, Եկեղեցու և հասարակական կազմակերպությունների ջանքերի կոորդինացման անհրաժեշտությանը՝ արդեն իսկ այս համագումարը կարևոր քայլ նկատելով այդ ուղղությամբ:

Եռօրյա ժողովի համար որպես առաջնորդող խորագիր ընտրվել էին երկու թեմաներ՝ «Կրթական բարեփոխումներ. կրթական համակարգի ներկան և ապագան, Եկեղեցու, պետության և քաղաքացիական հասարակության համագործակցության հեռանկարներ»՝ կապված արտադպրոցական կրթության հետ, և «Կրթությունը և արժեքային համակարգը անհատի ձևավորման և կայացման գործընթացում»:

Համաժողովին ներկայացվեցին հետևյալ զեկույցները՝ «Տեղեկատվություն կրթական բարեփոխումների գործընթացի վերաբերյալ, արհեստագործական ոլորտի զարգացում» (Վաղարշակ Խաչատրյան, Կրթության ազգային ինստիտուտ, Մասնագիտական կրթության բաժնի վարիչ), «Կրթություն ողջ կյանքի ընթացքում. արհեստագործական ոլորտի զարգացում, միջազգային կազմակերպությունների դերն ու համագործակցության հեռանկարները» (Նազարեթ Նազարեթյան, Գերմանիայի ժողովրդական բարձրագույն դպրոցների միության Հայաստանի մասնաճյուղի ղեկավար), «Մասնագիտական կրթության իրավական կարգավորումը Հայաստանում. հնարավորություններ, խնդիրներ» (Մարինե Հակոբյան, ՀՀ Ազգային ժողովի գիտության, կրթության, մշակույթի և երիտասարդության հարցերի մշտական հանձնաժողովի փորձագետ, գլխավոր մասնագետ), «Համայնքային կայուն զարգացում. վկայություններ դաշտից» (Անաիդա Ալլահվերդյան, «Կրթություն հանուն կա-

յուն զարգացման» հիմնադրամի գործադիր տնօրեն), «Սոցիալական կենտրոնների և հասարակական կազմակերպությունների դերը արհեստագործական ոլորտի զարգացման գործընթացում» (Վարազդատ Կարապետյան, «Գեղարքունիքի մարզի առևտրաարդյունաբերական պալատ» հասարակական կազմակերպության նախագահ), «Արտադարձական կրթության դերը մասնագիտական կողմնորոշման և անհատի ձևավորման գործընթացում» (Նանա Դոլիաշվիլի, Թբիլիսիի երիտասարդական պալատ, Վրաստան), «Արտադարձական կրթություն և մասնագիտական կողմնորոշում» (Մելանյա Դավթյան, Կրթության ազգային ինստիտուտ, Դաստիարակության և լրացուցիչ կրթության բաժնի վարիչ), «Կրթական բարեփոխումներ. հասարակական կազմակերպությունների դերը այդ գործընթացում» (Իոան սրկ. Դիդենկո, Ուկրաինայի Միջեկեղեցական օգնության համակարգման հանձնախմբի տնօրեն), «Ծխական գործունեություն և քրիստոնեական դաստիարակությունը՝ արժեքային համակարգի ձևավորման գործընթացում» (Տ. Կյուրեղ քին. Տալյան, Կոտայքի թեմ), «Հասարակական կազմակերպությունների դերը արտադարձական կրթության և անհատի ձևավորման գործընթացում» (Միկոլա Մատրունչիկ, Միջեկեղեցական առաքելություն «Քրիստոնեական սոցիալական ծառայության» տնօրեն, Բելառուս), «Սոցիալական կենտրոնների և հասարակական կազմակերպությունների դերը արտադարձական կրթության զարգացման գործընթացում» (Աստղիկ Ասրյան, Գուգարաց թեմի քարոզչական և սոցիալական ծրագրերի պատասխանատու), «Անհատի ձևավորման խնդիրը արդի արժեհամակարգի և կրթության համատեքստում» (Տ. Վազգեն վրդ. Նանյան, Մայր Աթոռ Ս. Էջմիածնի Գևորգյան Հոգևոր Ճեմարանի տեսուչ):

Խմբային քննարկումները ծավալվեցին հետևյալ թեմաներով. «Մասնագիտական կրթության հիմնախնդիրները և լուծման ուղիները», «Հկ-ների և պետության փոխհարաբերությունները և գործակցության հնարավորությունները», «Եկեղեցին և լրացուցիչ կրթությունը. խնդիրներ և լուծումներ», «Արժեքային մեթոդյա համակարգի խնդիրները և կրթության դերը դրանց հաղթահարման գործում», «Եկեղեցի-պետություն՝ կրթական և սոցիալական համագործակցության հեռանկարներ»: Համագումարին քննված նյութերի առնչությամբ որոշվեց պատրաստել նաև հուշագիր:

Ժողովը վարեց ԵՀԽ Հայաստանյան Կլոր Սեղան հիմնադրամի հոգաբարձուների խորհրդի անդամ Տ. Վահրամ քին. Մելիքյանը:

Հունիսի 10-ին, առավոտյան, համագումարի մասնակիցները Կեչառիսի վանքում մասնակցեցին կիրակնօրյա ժամերգության, ապա այցելեցին Կոտայքի թեմի Զրվեժի Սուրբ Կաթողիկե եկեղեցի, ուր ծանոթացան եկեղեցուն կից գործող սոցիալական կենտրոնի գործունեությանը:

ՄԱՅՐ ԱԹՐԱՆ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ